

Regional News Unit AIR Aizawl
Sunday, May 12, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoramin tuialhthei a lakluhna Rel kawng chhia siam that a nih tak avangin reiloteah tuialhthei lakluh a inphaman chho tura beisei a ni.
- Nimina National Lok Adalat-ah Mizoram pumah thubuui 298 chinfel a ni.
- May ni 7-a vote thlak Lok Sabha inthlan thawh 3-naah khan vote za-a 65.68 a tla.
- Thla engemaw zat Covid-19 hrikai hmuhchhuah a nih tawh loh hnu-ah Manipur-ah hmuhchhuah leh a ni.



POL

Rel kawng chhiat avanga Mizorama petrol leh diesel lakluh a khaihlak hnuah rel kawng hi siamthat a ni tawh a, reilo teah tuialhthei lakluh pawh a inpha man chho tura beisei a ni.

Nimina sorkar thuchhuah tarlan danin, tun dinhmunah Mizoram aiin Tripura-in harsatna an tawh nasat zawk avangin rel-in tuialhthei a phurh hmasak pahnih chu Tripura tan zuah phawt a ni ang a, a pathumna chu Mizoram tan IOCL hotuten ruahmanna an siam a ni. Hetianga rel kawng a lo that takah chuan petrol leh diesel hi dan pangngai angin tluang takin chat lak lovin lak luh chhonzawm theih a ni tawh ang.

Mizoramin harsatna a tawh mekah mipuite chia lo turin Food, Civil Supplies & Consumer Affairs Department chuan ngenna a siam a, harsatna hun remchanga la a, petrol pump thenkhatten a hlawma black-a zawrh tur lo pe chhuak thin an awm tih hriat a ni tih sorkar thuchhuah chuan sawiin hemi vil tur hian District hrang hranga FCS&CA Department, Deputy Commisisoner office leh SP office tangkawpten hma an la a, petrol pump-te CCTV footage thlengin en thin tur TIH a ti.

Hetiilai hian Petroleum Entrepreneurs' and Transport' Union of Mizoram (PETUM) chuan thuchhuah siamin Food, Civil Supplies & Consumer Affairs Department in thuchhuah a siam an chhanglet a, thu hriatna rintlak leh chhui chianna awm hmasa loin petrol pump neitute vaukhanna niawm tak thuchhuah an siam a, an trade licence cancel sak hial tura hma lak a tum a, hei hi hriatthiam har an ti tih an thuchhuah-ah an tarlang a ni.

PETUM chuan tuialhthei lakluhna kawngah harsatna awm mahse a theih ang anga Petrol Pump neitute leh a phurtute'n mipui mamawh puhru tura an thawh ve mek lai a, thuchhuah dengkhawng tak a awm ta mai chu mak an tih thu leh Food, Civil Supplies & Consumer Affairs Department thuchhuah anga sorkar thuchhuak kalha Petrol/Diesel hralh an awm a nih chuan dan hmanga hma lak mai tur ni awm tak a nih lai a Petrol Pump neitute laka mipui rilru dik lo puttir thei tur ang zawng a thuchhuah siam a ni chu a pawt takzet a ni an ti a, tun hnuah chuan chhui chiang hmasa lo a thu dengkhawng tak inchhuah khumna thleng tawh lo se an tih thu an tarlang.

An thuchhuah chuan Mizoram in Petrol leh Diesel lakluhna kawngah tun hma atangin harsatna a lo tawk fo tawh thin tih sawiin, Mizoram in Oil Depot a neih ve loh avangin harsatna a tawk hma thin a, Mizoram in Oil Depot a neih ve ngei theih nan a sorkar hmalakna pawh beiseina sang tak nena an thlir mek tih an sawi bawk a ni.

<><><>

CM

Assamese kumthar, Rongali Bihu chu nimin khan Assam Cultural Society Mizoram bultumin Aizawl Vanapa Hall ah hman a ni a. Chief Minister Pu Lalduhoman he hun hi a hmanpui.

Chief Minister chuan, hnam tinin tobul an nei theuh va, hnam nun ze mawi leh tihdan phung tha tak tak an nei thin a. Chung pi leh pute atanga tihdan tha leh hnam nun ze mawi tak tak te chhawm nun zel chu a mawi em em a, thangtharte mawhphurhna pawimawh a ni, a ti.

Mizoram chu British awpna hnuai ah Assam huam chhungah hun rei tak a bet a, chumi hnuah district council te neiin state hrang a nei chho ta zel a. Ram inthenawm an nih angin kawng tinrengah an inmamawh tawn a, an tanho a ngai a, inrem taka hmasawna rahbi rah chhoh tlan zel a tul hle a ti a. Kumin kumtir lama Assam Chief Minister Pu Himanta Biswa Sharma nena an inkawmnaah pawh ramria boruak ralmuang awmtir leh harsatna siam lo zawng zela awm an remti dun a ni a ti.

Chief Minister chuan chhan hrang hrang avangin Assamese engemawzat Mizoramah an awm mek tih sawiin, thlamuang tak leh hlim taka an awm a beisei a, inunauna leh inhriatpawh tawna tha siam zel ni se a ti a ni.

Rongali Bihu lawmna hi Assam Cultural Society, Mizoram President Dr. PC Kalita chuan a kaihruai a ni, Mizoramah hian Assamese 500 vel an cheng mek anga chhinchhiah a nih thu a sawi.

Rongali Bihu ah hian Bihu lam leh zai te, Assamese hnam ze pholang thei thil te entir a nih bakah Nepali lam te, Cheraw te entir a ni.

<><><>

LOK ADALAT

Ram chhung hmun dangte rualin nimin khan Mizoramah National Lok-Adalat huaihawt a ni a. Samkhai zawk leh sum sen ngai lova thubuai chinfelna Lok-Adalat hi State Legal Services Authority kaihruainain Mizoram-a district 8-ah leh Gauhati High Court, Aizawl Bench-ah te huaihawt a ni.

Thubuai ngaihtuah tur case 904 a lut a, chungte chu mimal pawisa inpuktir, rul leh thei lo thubuai te, Bank Loan rul tha thei lo thubuai te leh civil case hrang hrang te an ni.

National Lok Adalat-ah hian Mizoram pumah a vaiin thubuai 298 chinfel a ni a. Pawisa kaihnawih thubuai chinfel hi cheng vbc 5 nuai 11 sing 5 & 226 a tling a ni.

Lok-Adalat in a rel theih thubuaite hi Criminal Compoundable Case te bakah Civil Case chi hrang hrang an ni a, hetiang rorelna hi Lung In intantir zawnga kalpui a nih ve loh avangin thubuai neitute tan an thlang zawk thin a ni.



PLANT HEALTH

International Day of Plant Health' vawiina khawvel pum huapa hman tur pualin Central Integrated Pest Management Centre (CIPMC) chuan mipuite hnenah thing leh mau bakah thlai hriselna a pawimawh zia zirtirna program hrang hrang nimin khan an buatsaih.

Thing leh mau thlai hrisel chuan leilung hriselna a thlen tih entirna atan Save Plants-Save Planet' tih thupuaia hmangin 'International Day of Plant Health' hi hman a ni . He Ni pual hian Central Integrated Pest Management Centre (CIPMC) chuan 'Conservation of Natural bio-control agents' leh 'Safe and Judicious Use of Pesticides' tih thupuaia hmangin mipuite zirtirna program hrang hrang a buatsaih a. Kisan Gosthi, IPM exhibition, Awareness Campaign, thingphun runphun leh Zirlai naupangte tan intihsiaknate an buatsaih a ni.

Ningani kalta khan Agriculture & Farmers Welfare Ministry hnuaiia Central IPM Centre chuan 'Save Plants, Save Planet' tih thupuaia hmangin Little Kingdom School, Chhinga Veng ah lem inziah siak an buatsaih a, Kendriya Vidyalaya, Aizawl-ah Essay inziahsiak an buatsaih tel baw.



NURSES DAY

Trained Nurses Association of India, Lawngtlai District Branch chuan International Nurses Day nimin khan Lawngtlai ANM School Conference Hall ah hmangin, Lai Autonomous District Council a Chairman, Pu V.L.Hmuaka'n a hmanpui.

Pu V.L.Hmuaka chuan Nurse hna chu theihna zawng zawng nena inpumpeka thawngai a ni a, a hautakin a hahthlaka, mawhphurhna sangtak an chung a inngat a nih bawk vangin miinthlahdahte tan Nurse hna chu thawh ve ngawt chi a nilo a ti a, damlo te taksa damna piahlahmah an thlarau damna tura Missionary hna thawhpahna remchang tak Nurse hna ah chuan a bettel a, taksa leh thlarau damna, an damlo enkawlten an neih theih nan theihtawp chhuahturin a fuih.

Kumin International Nurses Day thupui atan Our Nurse, Our Future, the Economic Power of Care tih hman a ni a, ANM School, Lawngtlai Principal Pi F.Lalnunsiami'n thuchah tawi sawiin Nurse te chuan an hnathawhah an mahni himna tur leh hmasawna tur an ngaihpaawmawh a ngaih thu a sawi a, Zirna ah Medical Line chu a harsa ber a, General line a zirtha peihlo te tlankhawmna tur a nihloh thu sawiin, tihtak takna nena tuichilha rawngbawlna a ngaia luhchilh chi a ni a ti.

Lawngtlai a International Nurses Day hmanna hi Pi C.Lalnunziri W/S District Hospital, Lawngtlai chuan kaihruiin, Lawngtlai a Damdawiin pathum District Hospital, lawngtlai, Lairam Christian Medical Centre leh Christian Hospital Lawngtlai a Nurse thawklai leh Pension tawh te, ANM School Lawngtlai a Zirlaite leh sawmbik an tel a, chawhnu lam ah Trained Nurses Association of India, Lawngtlai District Branch hruaitu thar thlanna neih a ni.

International Nurses Day hi a huntak chu vawiin hi a ni a, remchan zawkna vangin Lawngtlai ah chuan nimin khan hun hman a ni.

<><><>

EC SAYS, 65.68% VOTER TURNOUT WAS RECORDED IN 3RD PHASE OF LOK SABHA ELECTIONS

May ni 7-a vote thlak Lok Sabha inthlan thawh 3-naah khan vote za-a 65.68 a tla tih Election Commision chuan a sawi.

Vote thlak dan chhianchhiahaa a lan danin, mipa vote nei zinga za-a 66.89-in vote an thlak a, hmechhe vote nei za-a 64.41 in vote an thlak a, tuai leh patil vote nei zinga za-a 25.2-in vote an thlak bawk a ni.

Election Commission sawi danin Assam chu hmeichhe vote nei vote thlak that berna a ni a, za-a 85.34-in vote an thlak a. Uttar Pradesh chu hmeichhe vote thlak chhiatna ber a ni a, za-a 56.01-in vote an thlak a ni.

Lok Sabha inthlan thawh 3-na a zawh tak hnu hian India ram state leh UT 20 chhunga Parliament bial 283-ah vote thlak fel a ni tawh a ni.

<><><>

FOURTH PHASE OF LOK SABHA ELECTIONS

Naktuk thawhtan ni khian Lok Sabha inthlan thawh 4-na vote thlak a ni ang. Hemi rual hian Andhra Pradesh inthlan ni khata zawh tur leh Odisha Assembly inthlan thawh 1-na tur vote thlak a ni dawn bawk a ni.

Lok Sabha inthlan thawh 4-naah hian State leh UT 9-a Lok Sabha bial 96-ah vote thlak ani dawn a. Lok Sabha inthlan thawh 4-na atana campaign hun pawh nimin tlai khan a tawp tawh a ni.

<><><>

A FRESH CASE OF COVID-19 DETECTED IN MANIPUR

Thla engemaw zat Manipur-a Covid-19 hrikai hmuhchhuah a nih tawh loh hnu-ah May ni 10, Zirtawpni khan hrikai hmuhchhuah leh a ni.

Covid-19 hrikai an hmuhchhuah thar leh hi hmeichhia, kum 66-a upa, Imphal East district ami a ni a. Tunah hian Imphal-a Jawaharlal Nehru Institute of Medical Sciences (JNIMS)-ah enkawl mek a ni.

JNIMS Professor L Deben Singh-a chuan he damlo hi May ni 7 khan awmna leh a behbawm avanga damdawiina dah a nih thu a sawi a. Hetah hian Covid hri a kai leh kai loh enfiah a ni a, May ni 10 khan Covid-19 hri a kai tih hmuhchhuah a ni ta a ni.

Director chuan damdawiin lam an inbuatsaih that thu leh chi-aina tur a awm loh thu a sawi a. Mipuite chu Covid laka himna dante zawm tura ngenin, tul lova punkhawm pumpelh tur leh hmai tuama vuah tha turin a ngen a, Vantlang auhmun (social media) lama finfiahna tel lo thu vawrh darhte awih lo turin a chah bawk.

<><><>